

Partiit nunanit allanit tapiissutinik tapiissuteqartunik
pissarsiaqarsinnaatitaannginnermut aamma partiit nunatta avataani najugaqartut
angerlarsimaffeqartulluunniit Qallunaat Nunaanneersut Savalimmiuneersullu
inerteqqummut ilanngunneqarnissaat pillugu Inatsisartut inatsisaat nr. 14, 4. februar
2025, § 4b allanngortinneqarnissaanut Naalakkersuisut inatsimmut allannguutissamik
suliaqaqqullugit Inatsisartut aalajangiiffisassaattut siunnersuut.
Siunnersuut kingusinnerpaamik UKA2026-mi saqqummiunneqassaaq.
(Inatsisartunut ilaasortaq, Pele Broberg, Naleraq)

Akissuteqaat

(Naalakkersuisut Siulittaasuat)

Siullermeerneqarnera

Inatsisartuni ilaasortamut Pele Brobergimut siunnersuut pillugu qujanaq.

Siunnersuutigineqarpoq Partiit naatsorsuutaasa tamanut saqqummiunneqartarneri pillugit Inatsisartut inatsisaanni nr. 14, 4. februar 2024-meersuni § 4b allanngortinneqarnissaa. Tamanna aalajangersagaavoq nutaaq inatsisartut eqqartoriigaat aammalu ukioq manna siusinnerusukkut akuersissutigeriigaat. Naalakkersuisuniit inatsisip aalajangiiffigineqarnerani tunngavilersuutaasimasut erseqqissalaassavagut:

5. februar ukioq manna aallarnerfigalugu Inatsimmi § 4b naapertorlugu partiit nunatta avataaniit imaluunniit isertorlutik tapiissuteqarniartunut tapiissutinik tiguisinnaajunnaarput. Avataaniit tapiisartut imatut paasineqassapput, tapiisartut Kalaallit Nunaata avataani najugaqartut angerlarsimaffeqartulluunniit. § 4b malillugu immikkut isiginninnermi taamaallaat pineqarput Kunngeqarfiup iluani partiit nalunaarsorneqarsimasut.

Taamaalilluni § 4b-mi aalajangersakkap Europami siunnersuisooqatigiiniit nunanut ilaasortaatarisaminnut partiinut politikkikkut suliaqartunut namminersortuniit aningaasaliiffiginnissinnaanerit killersimaartinnissaannut inassuteqaataa malippaa. Inatsisartunilu Inatsiseqarnermut ataatsimiititaliap § 4b-mik suliarinninnermini tamanna pingaartissimavaa taamaattorli partiit Kunngeqarfiup iluani partiit parteeqatiminnik tapiiffigineqarsinnaanerit ammatillugu. Ataatsimiititaliamit imatut tunngavilersorneqarpoq: ”Matumani siunertarineqarpoq periarfissaqartissallugu nunatsinni partiit folketingimi assersuutigalugu ”parteeqatiminnik” tapiissutinik pissarsisinnaanerit

Siunnersuutigineqartup siunertaa Naalakkersuisut isumaqatigaat. Politikkikkut suliniutinut aningaasaliissutit Naalagaaffeqatigiinnerup iluaniit avataaniilluunniit pigaluarpata immikkoortinneqartussaangillat.

Naalagaaffeqatigiinni partiit Danskit, Savalimmiuneersut nunatsinneersullu ukiorpassuarni suleqatigeereerput tamannalu politikkikkut suleqatigiinnerulluni. Tamanna ingerlaannartariaqarpoq pitsaasuummat taamaattorli aningaasatigut suleqatigiinnissaq isumaqatiginarani.

§ 4b-mut ersarissaasoqarnissaa Naalakkersuisuniit isumaqatigaarput taamaattumillu inatsimmut allannguutissatut siunnersuutip taamatut isikkoqartillugu akuerineqarnissaa inassutigalugu.